

١
د / طه حشيش

مريم وفاطنه

الطبعة الأولى

٢٠٠٨



تسويق ونشر

مجموعة أجهال لخدمات التسويق والنشر والإنتاج الثقافي

الكتاب: مريم وفاطنه
المؤلف: د/ طه حشيش
الطبعة الأولى: القاهرة ٢٠٠٨
رقم الإيداع: ٢٠٠٧/٢٤٩١٠
الترقيم الدولي: I.S.B.N. 977-6215-19-X

حشيش، طه.
مريم وفاطنه/ طه حشيش. ط١. - القاهرة:
مجموعة أجيال لخدمات التسويق والنشر والإنتاج
الثقافي، ٢٠٠٧.
١١٢ ص؛ ٢٠ سم.
تدمك: ٩٧٧-٦٢١٥-١٩-X
١- الشعر الشعبي - تاريخ - العصر الحديث.
أ- العنوان ٨١١,٩

مریم وفاطنه

خالد عبد الصمد خفاجي

المدير العام

عادل متولي

مدير النشر

الجمع والصف الإلكتروني

القسم الفني

إيمان خفاجي

إشراف وتنفيذ

عطية الزهيري

تصميم الغلاف: الفنان

مطبعة صحوة

طباعة



تسويق ونشر

مجموعة أجيال لخدمات التسويق والنشر والإنتاج الثقافي

الإدارة والمكتبة: ٤٤٩ ش السودان - المهندسين

الدور الأول - شقة ٤

أمام مجمع محاكم شمال الجيزة.

التسويق: ٠١٢٣٧٠٥٠٢٤ - ٠١٠١٨٨٩٣٦٣

Email: aagyal@yahoo.com

aagyal@hotmail.com

الإهداء

- * إلى روح أستاذى العظيم أ. د. على خليفة أستاذ الكيمياء الحيوية
بطب عين شمس الذى علمنى الحب والتسامح.
- * إلى صديقى العزيز/ ناجد مسعود جرجس المحب والمتسامح دائماً.
- * إلى حمائى "سامية" الاسمر على مسمى والهبة المتسامحة لأقصى حد.
- * إلى كل إنسان لا يفرق بين البشر إلا بالحب.

طه حشيش

مفتتح

الشعر زى العسل
لكن بدون... نحله
والورد رمزه وصل
لما الحبيب... راحله
ياللى غويت الأدب
هات الكتاب لإبنك
راح تلقى كل الكتب
بالسر.. هاتبوحله

إسألني عنيكى

تسألينى إيه حكايتى

بتقولى عايز إيه؟

إسألني عنيكى الجريئة

جوه قلبى بتعمل إيه!!



كات بتعزف لحن خلى القلب يرقص

زى مركب حُب فيه قلبين حبايب

وقت عصر فى بحر موجه حلو هادى

يرفع المركب شويته لفوق

وينزل بالهداوه



زى غصن التوت يميل

يحضنه غصن الزيتون

لما يوم سمعوا الهديل

جاي يفتنى م الميون



لسه برضه بتسأليني
إيه حكايتي وعاييز إيه
إسألني عنيكى الجريئة
جوه قلبى بتعمل إيه!!



ليه ما بتدريش قولى لى؟
ليه تدارى الابتسام
دى العيون الطعمه قالت
من سُكات.. كل الكلام



مش راح أندم إننى شفتك
أو عرفت الحب يوم
ده إنتى كنتى جوه قلبى
حلم طفل فى عز نوم



ياما كنت أتمنى حلمي يطول.. يطول

وأحضن الكف الحنين

بين إيديا وأمشى أقول

إنك إنتى زهر عطرى

وانتى... وانتى

بس حلمي الحلو.. مات

والكلام أصبح سككات

قمت ألقى إيديا فاضيه

إلا من قسوة ما فات



لستہ برضه بتسألينى

إيه حكايتى وعمايز إيه

إيه راح أحكى.. إيه ها أقول

إسألنى عنيكى الجريئة.. لما بتلاغى العقول

عمر الشقاوة

يا حبيبى..

اغزل الشمس بصباحك

خُذ سفينتى بين جناحك

رجع الفرحة لحدودها



دى الليالى..

يوم ما يرضى عنها قلبك

بدرها بيحضن نجومها

والبلابل..

البلابل تصحى تشرب منى حبلك

تقلق الأفراح فى نومها

والأغانى..

الأغانى تعودلى تانى

والنخيل يطرح أمانى

والربيع ينعش زمانى

والسما تدوّب غيومها



دى الحياة لما تجافيهها
تصبح الأحزان ناديةها
روحى ما يوم تشتيهها
أو عيونى تطيق ضلامها
يا حبيبى إفرد جناحك
وانسج الشمس بصباحك
خد سفينتى بين رياحك
فتّح الرقه فى قوامها



نفسى ترجع ليا تانى

ضحكة دافيه

ضحكه ياما نورت وش الصغار

نفسى ترجع ليا نسمة فجر صافيه

حننت قلب الكبار

نفسى ترجع لحن ساقيه

لحن ساقية - للفلايه -

تدور.. تقنى.. ليل نهار

دى الحياه من غير لقانا

حارة ضلمة الخوف حرقها

والطيور من غير غنانا

قول لى كيف تمرف طريقها

والزهور لو غاب هوانا

تتسى حتى لون ورقها



نفسى أشوف الضحكه تانى
تحضن الوجه الأصيل
والطيور تكتب أغانى
فوق.. على جريد النخيل
والسمك يغزل شباكه
من خيوط موجك يا نيل
نفسى أشوف الحب نسمة
تتعش الجسم النحيل
نفسى ألقى الكل عايش
والقلوب بتصب نور
والشجر مبسوط بيرقص
عاجبه ألحان الطيور
نفسى أشوف الحب ماشى
بين مكن دائماً يدور
والضمير ريان وصاحى
للسفارين فى البحور
نفسى لو ترتاح جراحى
وأغتسل من نور صباحى
وأزرع الأرض اللى بور

وفين بس زيك ألاقى؟

وبعد أما دبلت زهورى
ونامت طيور المودة
وتاهت مراكبي فى بحورى
وعشقت عيوني سهادها
وفجأة لقيت قلبى غنى
وعيني بترقص رموشها
ده لما نساييم شفايفك
حييتنى وما قدرت أحوشها
وكلمة "أحبك" فى قلبى
بنورك نقشنا حروفها



تعالى..

تعالى وإيدك فى إيدى
نلّم اللى راح واللى آتى
ومن عطرك أغزل قصيدى
وأرجع حلاوة حياتى
وشعرك يهفهف نسايم
يريح نفوس الصبايا
ده قبلك كان القلب صايم
ولا لحد ميل هوايا
ده وشك ندى فجر صافى
وصوتك ده لحن السواقى
وكفك حنين ودافى
وضحكة شفايفك بُراقى
وحُبك ده أهلى وناسى
وفين بس زيك الأقى؟

ساعة الوصل

مُنَايَا إِنَّكَ مَا تَتَسِينِي
وَلَا تَتَسَى أَسَى عَيْنِي
دَه أَنَا عَمَرِي مَا بِنَسَاكِي
وَإِنِّي دَنِيَّتِي وَدِينِي
زَهْوَرُ الْفَجْرِ لَوْ دَبَلْتُ
شَذَا ثَغْرَكَ رِيَا حِينِي
طَيُورُ الْفَجْرِ لَوْ غَنَتِ
فَدَه صَوْتُكَ وَتَلْحِينِي
وَلَوْ شَمْسُ الدُّنَا غَرِبَتْ
فَشَمْسِي أَنْتِي عَلَى جَبِينِي



نسيتى شمسنا الطالعة
ده أنا فاكرك.. وما نسيتك
وكنتى فى السنه الرابعه
وياحكى لك حواديتك
ويومها وقعتى فى الترعة
أنا شيلتك وعديتك
ودفيتك على الولعة
وهديتك.. وحببتك!!



ولما شمعتك كبرت
تجافينى وتتسينى
ده مية ترعتى جفت
ومين غيرك هاىروينى



تعالى نقلب الصفحة
نرجع عهدنا المونس
دا لما تلبسى الطرحة
وعينك شاردة ما بتهمس
وكننت أسأل: فى مين سارحة
تقولى.. فى قلبك المخلص
يطير قلبى من الفرحة
ونحضن بعضنا ونرقص
وعصفورتى أهى كبرت
وبعدت عن أفانينى
وطارت فى الفضا ونسيت
ده ريشها من رموش عينى



نسيتى لما كان يكبر
دُرانا.. كنا بنولع
عشان نشوى الدرّه الأخضر
وفى عيوننا بنطلع
نسيتى لما نتقن
فى حتة طينه ونبدع
عروستك حلوة وتجنن
وأنا طينتى بقت مدفع
وبعد الشمس ما تروح
نجيب البمب ونطرقع
◆◆◆

نسيتى الشط والرملة
ونسمة بحرنا هاله
أنا أحفر رملتى خندق
ورملك يتبنى فيلاً
عنياً صحيه ويتبرق
وعينك تحرس الفلّه
وساعة الوصل ما وصلت
ولسة إنتو هناك طاله
ومن يومها ومستتى
أقول يمكن تكون جايه
أقول يمكن تكون نسيت
طلب إزاي بس تتسينى
ده أنا عمري ما بنساکى
ولا تاهت عناوينى

حنّى يا ياسميننا حنّى

عيد سعيد عشان بحبك	قبل حبك كان فظيع
القمر غار من حلاوتك	والخريف أصبح ربيع
قلبي ده بيعشق شقاوتك	بيكى كل الكون أبيع
سامحى قلبي لما يعشم	يحضن الوجه البديع
ده إنتى حبك ليا بلسم	مالى غير قلبك شفيع
طول ما حُبك ليا يكبر	المزول يصبح وضيع



عام جميل بهواكى ليا	بيكى عايش أحلى عام
هاتى إيدك بين إيديا	لأجل ما يعم السلام
حبى ليكى أعظم هديه	يهدى روحى فى الظلام
يمحى ظلم الناس لقلبي	فوق جبينى يكون وسام
البشر باعوا المشاعر	كل شىء أصبح بكام!!
بس قلبي أنا بيكى شاعر	يا أم أجمل ابتسام



بُعدي عنك مستحيل قلبي ها يكسر ضلوعي
والآنين أصبح بديل إمتى يقرب يوم رجوعي
دول عنيكسي نجمتين نوروا بالشوق شموعي
فين حنانك ليّا فين؟ ده الحنين جفف دموعي
نفسى نصبح عصفورين ع الشجر نرقص نفثي
نفسى نفضل فرحانين إنتى روحى وحته مئى
نفسى ليل المجروحين والقمر ما يغبش عئى
دول شفافك وردتين حنى يا ياسميننا - حنى



حبك فرض

يا طير إرجع لأغصانك حياتي عايشها علشانك
ومين غيرك يفنى لى تعالى أرتاح فى أحضانك
ده أنا من غير هواك صايم ودقة قلبى ألحانك
ومن أول ما حببتك وأنا هايم فى أنفامك
تعالى لإرحمنى م الغربة وغرد كيف ما يحلالك
حياتي بدون هواك كريحه ما فيش أحلى من أيامك

❖❖❖

هواك خلّى الحياة جنة وأنا رضوان على بابها
ده حبك فرض مش سنه محلّى الدنيا بأحبابها
بدونك كيف أنا أتهنى وأنسى الفرقة وعذابها
منايا فى يوم ما تهجرنى لكاس الغربة أشربها

❖❖❖

يا قاسى إرحم محبينك وحن يا قاسى على قلبى
ده أنا مشتاق لنور عينك ينور فى الجفا.. درى
يا روحى روح على راحتك لآخر الدنيا.. يا حبي
ومهما بعدت أنا جنبك تنادى القلب هايلبى
عليل قلبى بدون حبك ومين غيرك يكون طيبى؟
ده أنا عاشق ومين يقدر يكون عاشقك وهايخبى!!

❖❖❖

أحلى ذنب

رغم بعدك عنى وافى ده إنتى روحى باحيا بيها
دق قلبك ليّا شافى فى الحياة طول ما أنتى فيها
الخریف بهواكى دافى والغيوم راحت عليها
ده إنتى وردة حُب صافى ياما طال الشوق إليها



نهر حبك يروى قلبى يأللى قلبك أصفى قلب
لو فى يوم راح تنسى حبي الطريق راح يبقى صعب
لو هواكى كل ذنبى يبقى حبك أحلى ذنب



يا حبيبتي فين عنيكى لأجل ما تنور سبيلي
دفعى إيدى بين إيديكى خلّى فرحك يملأ ليلي
قلبي شوقه زاد إليكى ما فى غير قلبك دليلي
إنتى وردة وريحتى فيكى لو دبلتى - آه يا ويلي!!



بكره لازم ننتصر

كان مُنايا إنسى أقابلك	وانتى جايه من السفر
وأرمى نفسى فى دفة حضنك	وانسى خوفى من البشر
نفسى أسمع دق قلبك	يحمى قلبى من الخطر
نور عنيكى يا حبيبتى	فى ليلى أجمل م القمر
والشقايف لما تهمس	زى عصفور ع الشجر
مش راح أقدر عنك ابعـد	حبى ليكى صار قدر
كل يوم القلب يعزـد	بكره لازم ننتصر



الحياه من غير لقاكى	ليل فى صحرا الخوف مكيه
والطيور لو غاب غناكى	تسهر الليل تبكى فيه
والورود لو راح شذاكى	تنسى لونها شكله إيه
إنتى شمسى يا ملاكى	نور عنيكى بأحيا بيه
وانتى نسمة بدون هواكى	عمرنا ها نعيشه ليه؟



إنت القمر

إنت القمر
ولا القمر ده طلعتك
يا للى الهوى
داعب فوادى بضحككتك
مين اللى قال إنك بشر
آل زينا
ده إنت ملاك
أتمنى أحيا فى جنتك
إنت المنى..
إنت الغنا
يا حبى أنا
قلبي طيوره زقرقت
على بسمتك

قبلك حياتي كات ضنا
واليوم هنّا
طول ما أنت مالي الدنيا..
من حنيتك
إنت الفنار بيك السفاين تهتدي
لما البحور تقسى
تتور شمعتك
بس إوعى تقسى يوم عليّا والنبى
دى الدنيا صعبه
هون عليّا برحمتك
إنت الحبيب
والقلب حالف بالنبى
تصبح نصيبه
وهواه يكون من قسمتك

يا ما شلت هم
وقلبي عمره ما اشتكى
لكن ما بقدرشى فى يوم على قسوتك
شوقى إليك
خلى الفواد عنك حَكى
ماسكتش إلا لما شاف
يوم دمعتك
من يومها حالف
إنه ما يعرف "حدا"
ولا يوم هaimشى فى سكه
إلا ف سكتك.

إزاي نخاف

إنت وأنا
قلبين نضاف
مع إننا
روح واحدة سارية في جسمنا
طب ليه نخاف؟
الحب نسمة للبحور
الحب ألوان الزهور
قبلك ما يوم حبيت أنا
ولا زى حبك يا حبيبي
أنا قلبي شاف
طب ليه نخاف؟
❖❖❖

حبك حياتى
وهو فيه بعدك حياه
صوتك آهاتى
ياللى قلبى من غناك الخير ملاه
قلبك سفينة الماشقين
وعنيك فنار الحيرانين
لو مرة موج البحر عالى
أو مركبى تاه فى الليالى
تتمد إيدك - يا حبيبى - طوق نجاه
تخضر أيامى المعجاف
طب ليه نخاف
إزاي أخاف
أنا زى حبك يا حبيبى
ما قلبى شاف
❖❖❖

الله عليك
لما ابتسامتك تحي قلوب كل البشر
أنا بين إيديك
أصبح ملك بعد أما كان قلبي حجر
إنت في سمايا نجمتي
وإنت في هوايا قسمتي
إزاي بقي أنساك أنا
ده إنت اللي راوي قلبي
من بعد الجفاف
إزاي أخاف
طلب ليه نخاف
أنا زى حبك يا حبيبي
ما قلبي شاف

فانوس عزرائيل

فوق ضهر عشه صغيرة

جنب البحيرة الزرقا..

في لون السما

على وش بابها منتوره..

شبكة قديمة حنيته

أصل دي شبكة عمنا

من لحمنا ومن دمنا

من همنا ومن فقرنا

ريسنا عم فرغلي...

صياد حليوة بس حظه مغليه

واد كله صبر وزاده شغله صبر تاني

أصعبها ربح عمر ما تقدر تقلبه

قلبه نضيف..
يحب ناسه ومش أنانى
من عمره فات ثلاثين سنه
مع إن وشه..
يقولك إنه ع المعاش
وضهره ده اللى انحنى
يديه شهاده بيانه عاجز ع العمل
ودا كله أصله من الشقا
وجبينه يحكى حرب بيعيشها البطل
وأدى دليله من الخنادق والحفر
على وشه - ياما - منتوره
ومراته ماهش أقل منه فى الشقا
صحيح مراته بنت حلوه محندقه
وعايشه دايم بالأمل
لكن تقول:
"طب فين بروح بين الليالى والسهر..
وش القمر"

رِسْنَا عم فرغلی
له م الولاد..
ابن سماره صغیرین
كان كل يوم بیشق موج الترعه بدری بمرکبه
وابنه الكبير.. دایما معاه بیرکبه
یضحک..
یغنی..
یضحک یغنی ویعمل إنه مش حزين
یضحک یغنی ونبض قلبه ده.. أنین
عمره ما شاف الشمس طالعه ف عشته
یسرح ویجی..
ویحمد الله ف نعمته.
قانع وصابر
قانع بشغله..
وصبره جای من حکمته
"هو ابن آدم إيه یعوزه..
غیر لقمه حلوه وهدمته"۱۹

وف يوم وقاعد فوق حصيرة عشته
والدنيا لسه قايمه تصحى مشقشقه
رجليه ماددها طينه سمره مشققه
همس فى ودنه إبنه الصغير
هات لى بابا فانوس ملون زى إبن أم إسماعين
فرغلى لونه اتخطف!!
والعرق نازل يسيل
فوق كتافه مد إيده حنينه:
النهارة لما هارجع
النهارة لو شاء الله هابقى أجيب لك ده الفانوس
بس إدعى لى يا سمكه
ربنا بيعت فلوس
وانشرح قلب الصغير
بابتسامته الفجر نور

قام فرغلى وزى عادته كل يوم
شق موج التربة بدرى بمرکبه
وشراع صغير ركبه فوق مركبه
وخذ معاه ابنه الكبير
لكن رياح البحر كانت قاسيه.. قاسيه
وكانها مستقصده!!
وكانها مستقصده!!
وكان ریح البحر كانت ناسيه..
ناسية إيه فرغلى وإيه يقصده!!
ويعد كل دى المجازفة
عاد فرغلى ويدون مؤاسفه
من غير فانوس يرضى الولد.
وقابله ابنه فى سكرته
فاتح إيديه.. وضحكته فوق فى السما
فين الفانوس يا با أجيب له شمعتة؟
رد ريسنا بأسى:
بكره أجيب لك..
بكرة إيه.. إنت يابا ليه بتكذب؟
إنت مش بتحبنى
إنت مش بتحبنى

فرغلى عنيه زغللت
"فرغلى عقله ارتبك"
وبكره برضه..
وبعد بعده وبعد بعده
زى عادته شق موج الترعه بدرى بمركبه
لكن ريح الترعه كانت كل مرة بتغلبه
رجع الجدع يلعن ف حظه..
واللى فيه يهبه
ولما رَوَّح عشته
إبنه جاى له تانى لأجل يأنبه
"فرغلى عقله اتهبل"
فكره شوئيه وقال لقيتها المعجزة
أسرق فلوس من عند عبده الجزمجى
"فرغلى عقله اتمدل"
صرخ ف عز الليل وقال: لأ يا غبى
مش هيا دى حكمة جدودى ومبدأى
الصبح هاطلب م الجيران..
يمكن..
يمكن يلبوا مطلبى
أول م راح لعاشور أفندى

بیریی نشئی صغیرین
ضحک ف وشه ضحکه عالیة خضته
"فانوس ده إیه یا عم الأسطی فرغلی
إیاک تکنون فاکرها هیصه سبهللی"

راح لعم الأسطی فتحی القهوجی
کان رده تعرف هو إیه:
"فانوس ده إیه اللی إنت جاء تقول علیه
إنت عارف قبله سعره ده ینیقی إیه؟"
ولف عم فرغلی

م القهوجی للطرشجی
أستاذ عاشور والجزمجی
کان رد واحد کلهم
"ده عدوتنا ولا یمکن أبدا ننجده"
فرغلی عقله اتروش

حلف لیاخذ تاره من کل الحوش!!
وف نص لیل الحزن نفذ فکرتہ
من فوق عامود النور برجل مشققة
وایدین سماره علیه تلف وتحضنه
ویسرعه تسبق نور فانوسه وشمعته
کان فرغلی..

فى وسط بيت أستاذ عاشور
أخذ فلوس يا دوب تكفى خطته
ويسرعة تسبق نور فانوسه وشمعته
كان فرغلى فوق العامود
ودماغه م الأفكار تدور
مسك بإيده وخط رجله ع العامود
رجليه حزينه بترتمش
مد رجله الثانيه ينزل ع العامود
وفجأة..
رجله تتألمش!!
وقع يلف
فرغلى قطع النفس
فى الفجر بدرى..
إثنين شباب من حنته
خارجين يلقطوا رزقهم
مدوا إيديهم قلبوه
وخدو الفلوس..
من غير أسف!!

مذكرات مهاجر رغبه أنفه

.. من جبال الفريه يا أمه

والغريب دائماً حزين

كلُّ همّه يعود لأرضه

بس مين يسمع له.. مين؟

❖❖❖

من جبال الفرية بابعت

دى الرسالة والعتاب

إن رضيتى أو رفضتى

برضه ها أبداً فى الحساب

❖❖❖

افتحي الدفتر وهاتي
نحسب الحاصل يوماتي
إيه جراك
الإيدين سمره وحزينه مشقته
إيه جراك
يا أم الضفاير حين تهفك كات تريح م الشقا
يا أم السواقي في الفيضان
سابهم أبونا قبل ما يسبنا بزمان
"سابهم لنا"
قال دي لنفسه
دي لمحمد
دي لحسين.. ولشهرزاد
كان مقسم كل أرضه ع الولاد
عمره ما قال الأرض دي "لجوز أمنا"
دولانه عمره في يوم ما فكر
إنك إنت
إنت يا أمه
يوم تحنى لضل راجل بعده..
إلا لضلنا

إيه جراك
م اللي شال فى البرد شالك
م اللي بوز أرضنا
مين ده يا أمه
يا أم الإيدين سمرة وحزينه مشققه
يا أم الضفاير.. حين تهفف
ككات تريخ م الشقا
❖❖❖

صديقنى
عشت طول العمر أحلم
وأززع الأوهام بكفى
والنهارده....
النهارده أنا وهمى يشهد
إنه عاجز التوهم
"للى فيكى اليوم بشوفه"
دول ولادك.. دول بناتك
فلاحينك.. بناتك.. خبازينك
"عمرهم ما داقوا م العيش غير حروفه"
❖❖❖

واللى مخه نضيف مهاجر
واللى هاجر كيف نلومه
طول ما قصر الزيف ده واقف
واحنا بنرتى له بومه

❖❖❖

والكتاكيت الصفار من كل حاره
نايمه جنب الحيطه.. يا أمه.. مخنقه
علشان م بترتلى لها ريش
يحميها من ظلم الشتا
عشان م طالبت يوم - بقوتها
والعيون تايهين حيارى
عين يمين بتبص فى العين الشمال.. ومبحلقه
.. مستغريه
وكانها ما يوم شافتها
والبطون لازقه فى عضمه ضهرنا..
متمسرة

والكفوف ناشفه وحزينه.. مخرمة
والبرد راقد ع الرثه
والعقول متشعلقه
دى العقول متشعلقه فى آخر نفس
والقصر واقف وبثقه
وفين راح يوم - يلاقى القصر - زى جهلنا -
للزيف حرس
والعقول متشعلقه فى آخر نفس



يا أم الإيدين سمره وحزينه مشققة
يا أم الضفاير حين تهفّف
كأت قرّيج م الشقا
يا أم الضفاير.. فين ضفايرك؟
ليه ضفايرك.. يا أمه صارت مشنقه؟؟

الناس والأرض

السما فُتِّحَ بيبانه

السما شال الببان

الفيوم تدخل وتخرج

فى الزحام ما شئ يبان

❖❖❖

غيمه تشكى لأختها..

سر الحقيقة اللى إندفن

"نهشوا الديابه عرضها

وادوروا وسرقوا الكفن"!!

❖❖❖

نزلت عيون كل الغيوم بالبكاء
دم ودموع ملؤ البحور م اللى إتحكى
يا..

ده إنتم قلوبكوا حنينه

واحنا هنا

ع المصطبه

نسمع قصص متحبكه

نرتاح لطعم الطبطبه

نضحك لتعبان سمنا

ونمجده جوه الفنا

❖❖❖

الدموع الجارية ديه مش غريبه عننا
الدموع ديه عرق
الدموع ديه عرق قلب انحرق وسط الفيضان
وعليه ماسك الفاس
بيشق بطن الأرض
والأرض زى الناس
جواها صار دبلان
وعقولها متحجرة
وعليه ماسك المنقرة
ينفخ فى بذر القطن
يلعن حيوب الدر
والقلب مليان ندم
"إزاي بجرة قلم.. على ورقه متعفرة"
"يوم الحساب خلته.. سورك وصوته انعدم"
سورك وصوته انعدم.



الدموع الجارية دية من هنا
من بُكا الأطفال وبرد الظلم ياكل عضمهم
يتلفتوا

وييسألوا ليل الشتا عن أمهم
لأجل ما يدفوا في حضنها
بس أمهم كانت كعود كبريت
وفي وسط ريع الشتا
البرد هز المطر

العود ضعيف إنطفا
نادوا عليه صرخوا
في الضلعة ضاع الأثر
أصل يا ناس - أمهم
كانت في حاحه لدفا

❖❖❖

الدموع الجارية دية من حديد
الدموع دى من حديد فى القرن داب
الدموع دى من ايدين عم إسماعين
لما يلقط فى هوا سيخ الحديد
ويدخله فى القرن لأجل ينضفه ويمدله
عم إسماعين دايمًا يقول:
"العلم لسه فى أوله
العلم ع الأبواب"
الناس تقول إنه إتهبل أو عقله غاب
كيف الكلام وإحنا وصلنا للقمر؟

عم إسماعين يصرخ يقول:

"إحنا وصلنا للقمر

وقلوبنا صارت كالحجر

العلم إيه سره

مش يخدم الإنسان

لوجه فى يوم ضّره

يبقى أكيد ده شيطان

والعلم يصبح جهل

والجهل يصبح علم

طول ما إنت خالى الأهل

الحرب زى السلم"

❖❖❖

قالوا له لا يا عم

الغيب ده مش فى العلم

الغيب فى مخ الناس

عم إسماعين يتصعب

يضرب على الكفين

"والعلم جاى منين.. العلم جاى منين؟"

❖❖❖

كان يوم مناه عم إسماعين
تدخل عقول الناس فى القرن تتعدل
لكن حماره زهق
ودماغه راح تتفلق
ولاحد فيه يسأل
ما يلاقى غير البُكا
ويغنى ويمول
"ياليل يا عين يا ليل
الصبر لونه جميل
وهدومه متقطعه
يكره يصير له ديل
وهايمشى ع الأربعة"

ياسى الودع ما ترد

جوة الجنينه جدع
أسمر بلون الليل
أصفر بلون الهم
لكن قلبه زلال
قاعد يشوف الودع
ويفتنى بالموال
"يا ليل يا عين ياليل
قالوا الحياة فى الموت
والموت ده أصله حياة
وإحنا حياتنا سكوت
وإن يوم نطقنا يكون
غاية كلامنا.. آه"

❖❖❖

يا ليل يا عين يا ليل
إحتار في إيدى الفاس
أزرع أو أجسها
الكل زارعه خلاص
طارح.. وأنا لسته

♦♦♦

قال له الودع... يا جدع
ياللاً إصحى بطل نوم
ده الخوف ما عمروش نفع
ولا مرة غير قوم.

♦♦♦

قوم دور الساقية
إغسل خدود الأرض
إحى البذور إحى
صحى اللى نام صحى
إزرع جناين ورد

♦♦♦

يرتاح لها العشاق

وتصبر المشتاق

في فراقه خلانه

لما يجي له رد

❖❖❖

قوم ياللا شد الحيل

خلّى الشجر يخضر

يحمى الضهورم الحر

ويدفى برد الليل

ويذل ليل البرد

قوم ياللا صحن النوم

ده الخوف ما عمروش نفع

ولا مرة غير قوم

❖❖❖

رد الجدع ع القول
طول عمرى شایل أنا
أحبابی فی عیونی
فی الفرح نفرح سوا
فی الشدة ینسونی
شبعتم عیونی بُکا
ولا حتّی عزونی

❖❖❖

ده أنا ضهری یاما إنحنی
من کتر ما شال شیل
أنا اللّی اعلّی البُنا
لکن نصیبی قلیل
أنا اللّی ضهری إنحنی
قبل الأوان بأوان
أزرع غیطانی "هنا"
وآجی أجمعه أتهان

❖❖❖

ساعة القضا والنار
مطلوب.. ما غيرى سيد
وأرجع ألقى الدار
منهوب.. وناس بتهذ
ده العقل ياما إحتار
والحيرة زى النار
تاكل ما ترحم حد
ياسى الودع ما ترد..
ما ترد!!
❖❖❖

الأوله آه

الأوله آه

التانيه آه

التالثه آه



الأوله آه ومين داق الهنا فينا

التانيه تاه صدئ صوتى بين المينا

التالثه ياه هئ سوق الخلق لفينا



الأوله آه ومين داق الهنا فينا ولم تكو إيديه النار

التانيه تاه صدئ صوتى بين المينا وموجة بحرهما الغدّار

التالثه ياه هئ سوق الخلق لفينا وأنا عقلئ يا خلق إحتار



الأوله آه ومين داق الهنا فينا ولم تكو إيديه النار وداق الويل
الثانيه تاه صدى صوتى بين المينا وموجة بحرها الغدار وحزن الليل
الثالثه ياه فى سوق الخلق لفينا وأنا عقلى يا خلق إحتار ومش لاقى لعقلى دليل



الأوله صاحب نجوم الضهر ماندمشى
الثانيه ملم كراكبيه لحد الساعة ما رجعمشى
الثالثه داير يلف فى سوق الخلق ما غلبشى

الأوله آه

الثانيه آه

الثالثه آه

...ولما فتننا

مشيت..

مشيت بدون ما تقول لنا

وفي لحظه غبت

من قبل ما تدوب شمعتك بين شمعنا

كنت إنت دبت.

من بين جبال الحزن في العشرين سنه

بشويش كده

قمت إنسحبت

❖❖❖

صرخت أنا...

صرخت لما فتننا

وقالوالى إنك - يا حبيبي - مُتْ

إزاي يموت

عود قمح لسه السنبله فيه ماستوت

قالوا لى إنك خفت
خفت لأحسن يوم يدوسك
يدرسك..
فى الجرن ساعة الضهر - نوج غدردنا
صرخت لما فتنا
إزأى يمد الليل إيديه المظلمه والظالمه
ويغمى شمس الفجر قبل ما تنفطم
صرخت لما فتنا
إزأى وقدام شمعتك
الطاله ع العشرين سنه ومنوره..
صفحة حياتك ترتعش
سرطان بيجرى فى دمها
الصفحة لسه صغيره
صفحة حياتك تنكمش
وينور شموعك تنكوى..
ويتطوى
دى الصفحه لسه ما اتقرت
الصفحه لسه ما اتقرت.

مصريا أحلى الأسامي

مصريا أجمل شفايف	بيها كنت أجرح صيامي
نفسى أتكلم وخايف	حد يزعل من كلامي
المفمض فيكى شاييف	والحرامى صار عصامي
مصر إنتى شمس فجرى	وانتى أحلامى فى منامى
مصر أفديكى بعمرى	مصريا أحلى الأسامي



مين هاتقدر يشتريكى	ده إنتى مهرى فى العلالى
ع الدوام بتيامى بيكى	ما إنتى أنسى فى الليالى
النهاردة ليه بأحس	إنى بيكى غير مبالى
إيه جرابك قولى بس	مين نهب مالك ومالى
لو هاقول ده من ولادك	خايف أطلع يوم ضلالى



أحلى ما فيكى إبتسامتك حتى وإنى فى الحروب
والأصالة دى علامتك ما فى غير صوتك طروب
شمس بتتور طريقى قلب دافى فى الكروب
ما فى غير حُبك حقيقى بدر ساكن فى القلوب
كُنّا بنعشق ترابك ما إنى ولادة وحلوب



طول حياتك شايله هم عشق محبوب للحبيب
عمر يوم ما قلتى كم عاش على كتافك غريب
بالشباب ضحيتى لأجل يرجع القدس السليب
والعذاب كم لون وشكل دُقتى حتى م القريب
بس أنا حابلك بشكل يا أم قلب كالحليب

مصر المحبة

قوم بينا نروى الأرض البور تطرح فرحة وتطرح نور
نزرع قمح يكفى ولادنا نزرع ورد جميل وزهور
غير الحق ما يوم نتكلم نكره غش الناس والزور

قوم بينا نروى الأرض البور

قوم يا محمد حُط إيديك فى إيدين مينا نعدى بحور
وأنت يا مُرقص شيل فى عنيك أحمد أخوك هاتعيش مستور
بُص العالم من حواليك من وحدتنا إزاي محسور

قوم بينا نروى الأرض البور

إحنا حضاره وديس وتاريخ والإرهاب ده كلام فى كلام
مين بيصنع فى الصواريخ مين بيكتر فى الأيتام
مصر دى مهبط للأديان طول عمرها فى أمان وسلام

قوم بينا نروى الأرض البور

قوم.. يا مصرى

قوم يا مصرى كفاية نوم دا اللى نام ويأنا قام
كله أصبح ليه يوم وأنت غرقان فى الكلام

❖❖❖

قوم وقول الحق مرة وانسى خوفك لو ثوانى
ليه حياتك يا بنى مرة من سكوتك.. يا أنانى

❖❖❖

السكوت مش كل مرة كان علامه للرضا
بُص حال الخلق مرة وصلوا كيف دول للفضا

❖❖❖

بالعلوم مش بالخرافه بالحقيقة بدون رُتوش
مش بجليك للجوافه أو بسفُ البردقُوش

❖❖❖

عندنا الكذب أهه كله يفتى "له.. مالوش"
خَدْنَا نُوبل فى الهيافه عننا... يا رب حُوش

أَنَا (*)

أَنَا.. أَنَا.. آه يا أَنَا

باركی لی طلعت لی سِنَه

والولد عایز ییوسنی

قومی حوشی الواد ده عَنَّا

❖❖❖

إلمبی وياه یا كُوكی

ده ابن خالتك زَي أَخوكی

وإبن خالك وإبن عمك

والولاد دول من جيراننا

❖❖❖

حَبَّو بعض یا مُهند

أوعی تضرب مُوها أَختك

دی حبیبتك خلَّی بالك

منها.. تبقى الدنيا جنة

❖❖❖

(*) أَنَا = الجدده = نینا.

يا لوى إنت الصغِير
بس طبعك ليه يحير
إغسل الأسنان تمللى
دى النضافة من إيماننا

❖❖❖

واد جميل والمضم بادی
يا لوى أقعد قصادی
هاتشفوه عريان ده عادى
يمرض العظام أمامنا
أنا - أنا - آه يا أنا

❖❖❖

يا مهند إيه الحلاوه
كل يوم بتزيد غلاوه
بس بطل دى الشقاوه
صوته حلو لما غنا
أنا - أنا - آه يا أنا

❖❖❖

آخر المنقود يا موهبا
حلوه خالص رى ابوها
القمر دى منين جابوها
بيها رب الكون كرمنا
أنا - أنا - آه يا أنا

❖❖❖

أحلى أم وأحلى دادة
دمها سكر زيادة
أمنا السموحه.. ريتى
يحميها م العين عشانا
أنا - أنا - آه يا أنا

❖❖❖

حبى كل الناس يا موهبا
الفريب قبل اللى منا
أصلى حب الناس علينا
فرض واجب جوّه ديننا

❖❖❖

عقل واحد.. قلب واحد
رب واحد.. إحنا كُنا
ليه العقول صبحت خرابه؟
والقلوب.. ده إيه جرائنا
❖❖❖

حبو بعض يا ولادنا
"طه" ماسك إيدته "حنّا"
الكنيسة جنب مادّته
ينصلح بالحب حائثا.

صبح النوم

عدتَ ما حدث منا شافها
إلا إما صارت بين رجولنا
شايلة الصغير.. فوق كتافها
والبرد بيتكتك سنانها
الشمس كانت فى الرحم
والقطر عمال يتزحم
فوق الشبك
تحت الشبك
الناس فى بعض بتتلحم
يتمرجحوا....
يطوحوا...
يترعشوا من كلمة "إحم"

بين الكراسى مددت
والفرشه.. هدمه مقطعه
الواد قعد على حجرها
بردان.. ونفسه ترضعه
أمه بصراحه.. تتكسف
تكشف قصادنا صدرها
الفقر..
الفقر غاصين عنها
أما الشرف..

ده عمرها

مع إن من كُتر التعب
الكل عينه مغمضه
بس الولد بردان قوى

والمعدة خاليه منفضته
عمال يببكي ويتلوى
فى صباحه نازل عضضه
ضمت رُكائبها.. إتكوررت
والواد على دراعها.. رقد
وبدا رضاعه إلا وصحى
مرعوب بصوت وش النكد
"ورق.. ورق.. فىن الورق"
ياللاً بلاش البهدله
بالبطاريه ف وشها
ف عنيه نازل زغلله
مدت إيديها ف صدرها
تدى له حق التذكرة
رجع لها إيديها وصرخ
هو إنت غاويه مسخرة

"فين ياختي طرد القفه دي"

"هاتي بلاش البهدله"

- قفه...!!!

دي حبة برتقان..

بسرح بهم لاجل الوله

- هاتجيبى ولا أنزلك

وعلى الرصيف.. تتشحورى

والبيته..

ما بتسمع ودانها..

إلا كلام الكمسرى

- مدت إيديها وطلعت

من كل جيب.. قرشين تلاته

- هاها صاحبنا وقال لها:

والله لا أنسيكو الشحاته

- الست غطت وشها

والدمع ف عنيهما جرى

وبصوت حزين من قلبها

الصخر منه ينبري

مدت إيديها للسماء..

يا رب

إنّ اللى عارف محنتى

وإنّ القوى ع المفتري

إنّ القوى ع المفتري

- والناس..!!

- طب هو كان فيه ناس

دى كراسى فوقها كراسى

كل اللى نام.. إنداس

والصاحى فيهم..

قاسى!!

آه يا نيل

ماشى ليه سلطان زمانك
من ولادتك فى (رينون)^(*)
حتى لما البحر الأبيض
لما كان أبيض بجد
وانت كان وشك زلال
والفواد طيب حنون
انهارده الوش عكّر
ميتك ما بقتش سُكر
جف ليه شجر اللمون
ريقى ناشف نفسى أبلّه من حنانك
والولاد السمر امتى راح يهلّو
يعلّو شانك
أوعى تحسب أنى عايش لأجل
نفسى

(*) رينون : نبع نهر النيل قبل بحيرة فيكتوريا.

لا: عشانك

ما أنت نفسى وانت دمي
كنت باغسل فيك ذنوبي
وأرمي همي فوق كتافك
كأت سماء في يوم لحافك
وأنت في الأحزان غطايا
وانهارده مين أخافك
حاسس أنك مش معايا
ليه مراكبك
خايفة ترقص فوق مياهاك
فين طيورك
فين غناها
في عز جاهك
مين إल्ली خلى الطير يغنى

بس برّة
ولا طعم الميه مرّة
قُلتك أنا ألف مرّة
احنا مش نسل الفراعنة
الفراعنة قدسووك
كُل عام كانوا ييسوك
هى احتفال مالوش مثيل
جُم ولادك لوئوك
غطوا وشك مكسوفين
من إللى حاصل فيك يا نيل
ولا خايفين من ملامتك
لا سلامتك
دول هانوك
لكن (ولو)
أصبر أنت لما يرحل كل (سو)
ما أنت طول عمرك أصيل
آه يا نيل

كاكسا كاوا

"إسموك آب"^(١)

يا بشارى.. قوللى

إسموك آب

كنت محمد أو عثمان أو هدّاب^(٢)

إنت واحشنى بعد غياب

إهدا شويه

خد "همشوكا"^(٣)

وقت الشدة

أنا برضو أخوكا

داحنا أخوات

ماحناش أغراب

إحنا وطنّا وربنا واحد

آدم أبونا وأمنا حوّا

(١) كاكساكاوا: إزاي الحال. والألفاظ الواردة فى هذه القصيدة من اللهجة البشارية حيث يعمل الشاعر بمدينة أسوان وعرف اللهجة البشارية فجاءت هذه القصيدة والتالية لها لأهتمام الشاعر بهذا الجزء الغالى من الوطن.

(٢) إسموك آب: ما إسمك.

(٣) هدّاب: إسم علم بشارى.

(٤) همشوكا: خد نفس.

"كاكساكاوا.. كاكساكاوا"

عاتب.. حاسب

حقك تسأل

يا للى ف توشكى وأبو رماد^(١)

طبعاً.. طبعاً

حقك تزعل

بس كفاه يا خويا بعاد

إحنا نسينا إنك من ثوبنا

وخلص ثوبنا

لو من تانى نسيته.. إصرخ

قول كذاب.

إنت أخويا وابنى وعمى

دمك دمي.. همك همى

يا للا تعالى وحط إيديك

ف إيدى أخوك..

يا للا وسمى

إحنا مدينه.. وانت الباب

دانت وحشنى بعد غياب

انت وحشنى.. بعد غياب

(١) أبو رماد: بلدة مصرية بشاريه على حدود السودان.

سما سيب وشارى^(١)

سما سيب..

ده واذ "أورجوندى"^(٢)

يعنى متنا.. ما هوش غريب

أسمر نحيف.. دمعهُ قريب

دمه زى شريات الفرع عند الغلابة..

أحمر خفيف

وسمارهُ..

حدقة عين جميلة

أما ضحكته..

بتشق ليل المحرومين

زى نفى العين ما يبرق..

لما بيشوف الحبيب.

سبا سيب

(١) سما سيب وشارى: اسم ولد وبنت نوبيه فى قصة ججاج أدول الكشر

(٢) أورجوندى: نوبى.

سما سيب وشارى
على شط نيل أسوان....
حتى دنقلة

غنوا سوا
حبوا سوا
شربوا سوا..

حب وحنان
شارى دى حلوه "إن بورو"^(١)
صوتها جميل جنان
لو تفنى كل الملايكه..

يحضروا
فرعونى أصلا وشها..

لو شفتها
تنسى اللى جاى واللى كان
سما سيب..

ده واد "أن تودا شجى ما"^(٢) شويّة
بكلامه أحلى من العسل..
سحر البنية

(١) إن بورو: بنت.
(٢) أن تودا شجى ما: ولد شتى

وحنانه غرق قلبها..

وبضحكته.. يشويه شويّه

شارى....

دى بنت حنينة

"أشرتما"^(١)

لكنها زى البنات

محتاجه ويا الحب..

حاجه تأمنه..

بصراحة مال

بتبص دايمًا ع الفنى وابن الحلال

سما سيب

يفتنى الليل بطوله.

الصبح بيحى ع اللضا..

ويهز طوله

لا شغله ليه ولا مشغله..

لكن وَلَه!!!

(١) أشرتما: حلوه جميلة.

شارى تحبه
لكن هناك "عبد الشكور"
وظروفه حلوه ف البلد..
ميسور
غمزت بعينها الحلوة شارى
عبد الشكور قال والله شارى
والتقى القلبين..
ومحفظة الفلوس

سما سيب..
وقع جوّه الكابوس
ومن يومئذ وانقطع
سما سيب تماما ع الغنا
من امتى قولوا يا بشر
الحب كان غلب الغنا!

مریم وفاطنه

مریم وفاطنه
قمریتین^(۱) .. حلوین.. جیران
صوتهم حنین..
قلبهم أخضر.. چنان
لعبوا سوا
ذاکروا سوا
ناموا سوا ف نفس المكان
سریر وحید بیضمهم
زغروته حلوه تلمهم..
آخر السنه

(۱) قمریتین: یمامتین.

ساعة ما نجحوا ف الإمتحان

فاطنه ومريم

عمرهم ما اتفرقوا

ف الصيف سوا

ف البحر عاموا

ف الشتا مع بعض ناموا

ولحاف صُغير ضمهم

لما الدفا يزيد

يعرقوا

الواد ملاك..

شاف فاطنه جوه البحر..

تفرق

صرخت طالبه النجاه

شدها.. ع الشط..

ذلك قلبها

أعطاهها قبله للحياه...

"حبها"

الحب من عند الإله
مش منّا...
يا عمّا
طول عمرنا نعبد إله واحد
حتى الوطن واحد.
وليه الفرقة طالت قلبنا ١٩١٩
يا عمّا
البت فاطنه.. بت طاهره
قلبها زى الملاك
والواد ملاك..
قلبه ده جَمَّار نَخِيل
أبيض قوى
والجسم من غُلب الحياة..
أسمر نحيل..
أسمر قوى!!

(1) جمار النخيل: قلب النخلة.

الأهل داسوا حبيهم
من غير سبب
لأ.. والمعجب
قالوا لمريم..
فاطنه إوعى تكلميهها أو محمد
حاسبي يوم..
أحسن أخوها يخطفك و...
ويا سلمك!!

إحنا أهلك.. آه يا مريم
دورنا إن نفهمك.
فاطنه... ١٩
إوعى من ملاك... لينصرك
إحنا أهلك.. آه يا فاطنه
واجب علينا... نبصرك
البت مريم..
وشها أبيض زلاك...
قلبها شمع العسل..
يرتاحوا فيه كل البشر.
مريم عنيتها شاردة.. زايغه..
مِسْهَمَة
القلب واقع م السما..
هُبْ إنكسر!!

مریم وفاطنه
فاطنه تشکی
مریم تحس بقلبها
مریم.. بتبکی
فاطنه تمسح دمعها
جاکلین بتبکی
من صدري کانو بیرضعوا..
لَمَّا يَشْبِعُوا
عیشه تحضن ف أختها
علی ایدی مشیوا حبه حبه
جاکلین وعیشه بیهمسوا
الله رحیم
الله محبه!!

الديك الرومي

تهت وتاهت بيبك الدنيا
ثركي ومالطي.. وكمان رومي
منفوش دايمًا كده ع الفاضي
مانت عارفني أنا ملو هدومي

❖❖❖

أنا كتكوت أصفر وصغير
غلبان.. لكن لو يوم أغضب
هاملا الدنيا زعيق وصغير
بلدي وياكل أنا عيش بلدي
وانت يا سيدي تاكلي "شوكير"^(١)

❖❖❖

(١) شوكير: اسم العيش اليهودي.

ليه يا حبيبى مقلوش عنك
بدل الرومى إنك فرعون
تفطر بيض تتغدى بجبنه
أو تتعشى سيمون وزتون
حقك تاكل أكل تحبه
بس إياك تصبح مديون



تاكل زى ما تاكل لكن
سيب لنا لو حته فتفوته
إحنا صحيح كتاكيت وغلابه
لكن لنا أعصاب مقلوته
ساعة الشدة بنبقى ديا به
رجلنا جامده تشوط وتصد
وف أيام وليالى قليله
مولدك يا ابنى راح يتفض



ليه بتفسر حبى إليك
إنى ضعيف وعبيط وخسيس
أنا ليك أحمس^(١) يا إبريز^(٢)
ليه بتطناوع باتراميس^(٣)
خُضت حروب وهزمت أعادى
وقت الشدة أنا باحمى بلادى
وليه يا ولادى..

صبحت فطيس



(١) أحمس الثانى: القائد العام للقوات المسلحة فى جيش الملك إبريز وكان محبوب وابن نكته ومحارب عظيم ويحبه الملك.

(٢) إبريز: ملك من الأسرة السادسة والعشرين الفرعونية.

(٣) باتراميس: قائد من قواد أحمس وكان يحقد عليه ويعمل الوشايات له مع الملك حتى كرهه الملك.

إنت الديك الرومى وإحنا
كتاكيت لكن بكره نفز
نكبر نبقى ديوك ونكاكى
نلبس بدل الملكى ده كاكى
ولأركان الدنيا نهز
إلا إن كلنا فى طبق واحد
ف الأفراح أو فى الأحزان
وننام ليلنا ما فيناش جاحد
ويجمعنا الصبح.. آذان

جوزأمی

عیش وسینا معاک.. نعیش
خللی صورتک.. ع الأفیش
أمنیاتنا مش کتيرة..

هی بس ألف عیش⁽¹⁾

عیش وسینا معاک.. نعیش
قوللی عیش غیمة ف سحاب
أو دُبابة م الذباب
أو مرایة فی الدولاب
زی ما انت عایزنی أعیش
ها اعیش

(1) ألف عیش: بلغة القرانین یعنی عشرون رغیف.

عيش وسيننا معاك نعيش
بس حاسب م اللي جى
فى المعارك مالننا.. زى
غيمة ممكن تبقى زين
أو تسيل فوق دماغك
أو تجيب فى الضملة داغك
والذبابة بجناحين
فيها داءك أو دواءك
والمراية فوق دولابك
فيها صدقك أو نفاقك
كل صبح تبص فيها
تلقى صورتك..
فيك بتصرخ..
إيه اللي جابك

بُص فيها شويه فكر
واوعى دَمَك يوم يعكّر
شوف عدّوك من صديقك
مين عليك.. أو مين معاك
م اللي عنده ضمير..
ومين..

يوم يخاف ولا يختشيش
عيش وسيبنا معاك نعيش
الحياة رحله.. قصيرة
بس إيدك مش قصيرة
واحنا عيّنّا عليك.. بصيره
ساكتة لو هاتعيش فقيرة

أما لو هنت الكرامة
هي دي سكة ندامة
تبتدى ولا تنتهيش
عيش وسيبنا معاك.. نعيش
إنت جوز الأم.. بس
كان زمان مالكش.. حسن
أما دلوقتي الحياة..
زهزت لك في العلالى
لا أنت عمى.. لا انت خالى
ليه بتخطف حُر مالى
حاجة.. أهلى أدوها لى
حق ليّا مش هدية
يبقى ليه تضحك عليّا
لو تبغنى.. ما اشتريش
عيش وسيبنا معاك..
نعيش

فلسطين

ياللى حجيت ألف مرّة
واعتمرت كثير كثير
فيها إيه..

لو رحت تمسح
مرّة.. دمهه للأسير
فيها إيه لو رحت مرّة
شفت طفله فلسطينية
رافعه.. إيدها بالحجارة
وهي راجعه م المدارس...

قول يا حارس!!

لسّه قلب البت أخضر
والضفايرع الكتاف
وانت قلبك ليه محجّر
والعينين صبحم ضّعاف
عامل إنك مش شايفها...

قول عارفها.. قول يا حاج!!

ليه يا حاج
وبعد كل الحج ده..
من بشر..
إزاي تخاف؟
فيها إيه لو يوم توطى
وتناولها.. دى الحجارة
ما أنت يا ابن الناس موطى
بس للأندال.. خسارة!!
للحرم.. لبيت وجيت
بالحرام.. أيام غنيت
فيها إيه لو يوم.. يا ريت
عشت مرة.. مش أنا
غصب عنى خلاص يا حاج
ما أعرف أنطق إلا.. حق
لو تحب أقطع لسانى
ليه يا حاج تعيش أنا

قبلتك دلوقتي فين ١٩

لما أولي القبلتين

داسوا أرضه..

بالجزم!!

أو عشان ما هو أقصى فاكره بعيد عليك!!

وإداريت جوه الحرم ١٩

فين براقك

تريطه ف الصخرة فين

ولاً فاكر صخرته..

تبكى عليها م الندم ١٩

لأ يا حاج

فين براقك..

م اللي ساقك..

زى قطعان الغنم ١٩

لأ يا حاج

فين براقك..

م اللي عاقلك..

تحي أمجاد البلاد

والجرح يصرخ بالألم
ليه بتجرى ع السنن
والفريضة ف الجهاد
لما يُحتل الوطن؟
إيه يا حاج
شفت أطفال الحجارة
ولا لا؟
شفته طبعا ع الشاشات
قول بحق
شفت طفل بيستوى
زى عنقود العنب
من عسكرى.. خوافة
بدبشك بندقيه بينضرب
خدت بالك لما مات..
ولا لا..
قول بحق؟

شفته طبعا ع الشاشات
زى ما شفناك يا حاج
من جبل عرفات تُرَجِّعْ
دعوتك كل الجهات
النفاق م الوش هُجْ
والإيمان م القلب وَجْ
والجبين بيشع نور
والدموع ماله العيون
نادمه عن كل اللي فات!!
دُفَّتْ زمزم!! ولا لأ؟
أد إيه كانت زلال
زمزم يا حاج....
تسرى على قد السؤال
ما انت عارف آه يا حاج
الرب رب للقلوب..
والنيه ف الأفعال

ليه بترجع كل شيء يرجع مكانه
تبني بين قلبك وبين الحق سور
والحرام عندك.. حلال..

م اللي قال؟

م اللي قال إن الخضوع فن وسياسة
"ده نجاسة"!!

م اللي قال إن الهوان ع النفس كان
فطنه وكياسه

"ده وكاسه"!!

م اللي قال إن الطمع فى المال.. فراسه
"ده طفاسه"!!

م اللي قال حته نحاس..

بالغش يوم راح تبقى ماسه

لا يا حاج..

طول عمرها هتميش.. نحاسه!!

شفناك يا حاج

وانت بتشاور لأهلك..

ع الشاشات

زى ما شفت اللى مات
شفت دوله ع الخريطة
قاعده زى الأرملة
ضهرها مسنود بحيطه
وعيالها حاطين الأيدين فوق الحدود
فى العيد حزينه..
قاعده إيدها مريمه!!
يا حاج عمرك شفت طفل..
يضرِب بطوبه مدرعه!؟
والعسكرى الصهيونى..
خايف.. ينزوى
ينزل لتحت ويختفى
خايف لعينه تتقلع
يا أمّه لسه بتهتفى..
عيب إختشى

فاكرنا بشويه كلام عن السلاح..

راح نرتشى!!

بالطوبه عمرك شفت آله مولعه

قول يا حاج..

دى مدرعة

المسكرى خايف لعينه تتقلع

يا حاج يا تروح تشتترك..

فى الانتفاضه...

يا تتجلع؟

سمارة

أسمرياً وش الحبيب أبيض كثير.. قلبه
والشمس لو يوم تغيب يحى الوجود.. حبه
يهدى بعطفه الغريب لوتاه فى يوم.. دربه^(١)
راح فىن يكون مأمنه قلب الزمان.. دار به^(٢)
افتح إيدك واحضنه هجر الحبيب.. طال به



حبيبتى قلبى طرى مش جميل أفعالك
إمشى عليه اتمخطرى يا بخته.. يوم شالك
شوف البعيد مفتري قام هز.. خلخالك^(٣)
صوته ف ودنى همس وحكى لى عن حالك
قاللى حبيبك فرس أنا قلت.. خيالك



(١) دربه: طريقه.

(٢) دار به: لف به وحيره.

(٣) خلخالك: الخلخال: سوار يلبس فى الرجل "الأنكل".

قلبك ده قلب التمر فوق التخيل.. عَلَاً
والفم شهد الخمر زاد الحياة.. حَلَاً
الليل فى لون الشعر والعين.. نجوم الفَلَا^(١)
قلبي لعنيكى مُجيب لو يوم تقول.. يَا لَأَ^(٢)
ياللى هواكى طيب للقلب لو يوم.. سَلَا^(٣)



عديت بحور الحب عايم على ضهرى
لاف يوم طلبت القرب ولا يوم نسيت نهري
محلاها عين الحبيب أهديها أنا عمرى
فارس وقلبي وحيد نفسى تكون مُهرى
مهالك يا قلب الحبيب ليه للقلوب.. تهري؟!

(١) الفلا: الصحراء.

(٢) يالا = يا ولد: يا واد باللغة العامية المصرية ولاد البلد.

(٣) سلا: نسى.

إسكندرية

يا إسكندريه حرام عليكى
خليتى قلبى.. ما بين إيديكى
زى المجينة
الصبح عاشق
بالليل مرافق
ف الضهر قلبى..
أجمل سفينة
الصبح عاشق أحضن شوارعك
وأشم ريحتك
بالليل مرافق موجك وبحرك..
بالسر أبوحلك
فى الضهر قلبى أجمل سفينة
يرفعها موجك زى العروسة
ترسى ف موانى
من تانى ترجع..
تشتاق لسبحرك

ناسك... فنارك

ليلك.. نهارك

مين فى الحلاوة والحسن قدك

والقلعة طالله ع البحر الأبيض

ع المرسى ترمى الصباح يوماتى

ويبوسوا خدك

والشمس تغزل فستانها الأبيض

بالطبط أدك

والموج ييجرى يحضن فى شطك

والبدر يحرس حسنك ليلاتى

يا إسكندرية بحرك حياتى

كورنيش ماليش غير إنى أعيش..

عليه أغنى

أنا حلمى حلمك

وعلمى علمك

ما أعرف لماذا؟

فيكى إيه ساحرنى

كل اللى فاكركه كان فى الأجازة

يومين أجيلك وأعوم ف بحرك

قوام يعدوا أرجع أروح

ده غصب عني

جايز بناتك السمر همة

جايز ولادك بنشاط وهمة

جايز حنانك ولا ابتسامتك

أنا إيه؟ حسدتك؟

لا لأ.. سلامتك..

أنا مش غريب

أنا مش هاشمحك

وحياة ملامحك

إلا إن تقولي..

إنت الحبيب

بالعطر فوحي

بالسر بوحي

وحياة عيونك

سرك ف بير!

ده هواكي روحي

بلسم جروحي

وف قلبي أصونك

لو أحب غيرك

أصبح ضريز

الفهرس

٧	مفتتح
٨	إسأل عنيكى
١١	عمر الشقاوة
١٥	وفين بس زيك ألقى
١٧	ساعة الوصل
٢٢	حنى يا ياسمينه حنى
٢٤	حبك فرض
٢٥	أحلى ذنب
٢٦	بكره لازم نتتصر
٢٧	إنت القمر
٣٠	إزاي نخاف
٣٣	فانوس عزرائيل
٤١	مذكرات مهاجر رغم أنفه
٤٦	الناس والأرض
٥٣	ياسى الودع ما ترد
٥٨	الأوله آه

٦٠	ولما فتنا
٦٢	مصريا أحلى الأسامي
٦٤	مصر المحبه
٦٥	قوم.. يا مصرى
٦٦	أنا
٧٠	صح النوم
٧٥	آه يا نيل
٧٨	كاكساكاوا
٨٠	سما سيب وشارى
٨٤	مريم وفاطنه
٩٠	الديك الرومى
٩٤	جوز أمى
٩٨	فلسطين
١٠٦	سمارة
١٠٨	إسكندرية